



# Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

**TAPAK 6**

Yangia anidakangma :



Tir Yimyim



tir\_yimyim



tir yimyim

**TAPAK 8**

Tripura CM-i Himachal Pradesh  
nem relief materials yok

Jay Gupta East Bengal nung  
küm 4 atema denogo



**VOL. XXII ISSUE NO. 328 (ADOK 328) DIMAPUR YANGTEPNÜ (THURSDAY) RONGJUI (SEPTEMBER) 11, 2023 ₹ 5.00**

## CorCom-i PM Modi semdangba mokdangtsü

**Imphal, September 10, 2025**

**(Agencies):** Manipur nung telungpur teloktemi tentetba Coordination Committee (CorCom) ajanga September 13 nü Prime Minister Narendra Modi-i Manipur semdangba mokdangtsü ayongzükogo.

September 13 anepdang 1:00 ako nungi tenzüker Prime Minister-i state toktsür mao tashi state ajunga mokdangtsü ta CorCom-i metetdaksü.

Ajisüaka iba tenokdangba kübok emergency, medical, media, aser tamangba yimsü sentongtem madener ta parnokisa ashi.

"India sorkari Manipur nung lisopur kintem tsüngda rara adokdaksütsü meranger. Parnoki Manipur nung India nütsüngtem agi süngdaksütsü sentong lir" ta CorCom media coordinator M Shak-Hen-i ashi.

"Manipur (Kangleipak) nung lisopur ajak ibala tasa nungi kümdanga alitsüla. Asenok

yimjung nung alitsü aser külem renloka aotsü atema ajungkettsüla" ta CorCom-isa ayongzükogo.

October 15, 1949 nü India nung dendaktsüba sülen Manipur yimtenren jenjang kanga mejungi aküm. Pei sasa ketdangsüa aliba state ka nungi Chief Commissioner's Province dang aküm. India sorkari tasa atonga 2023 küm local ketdangsürtem ajanga kin o kin tsüngda rara adoktsütsü ta parnokisa ashi.

Coordination Committee nung nung lenden nung amenoka aiba telungpur telok 6- Kangleipak Communist Party (KCP), Kanglei Yawol Kanna Lup (KYKL), People's Revolutionary Party of Kangleipak (PREPAK) along with its Progressive faction (PREPAK-Pro), Revolutionary People's Front (RPF, the political wing of the People's Liberation Army), aser United National Liberation Front (UNLF) dena lir.

## Nepal Gen Z-i Sushila Karki shimer



**Sushila Karki**

**New Delhi, September 10, 2025**

**(Agencies):** Nepal nung Gen Z ta ajartemi taoba Chief Justice Sushila Karki nem interim Prime Minister inyakdaksünür.

Nepal nung lanurtem online ajanga ghonda pezü shi amendang political party den sendaktepa aliba lanur shingai iba mapa meinyaktsüla ta mulungtep. Tarutsü olemtep nung lanurtem tenüng nung Karki-i jembitsü atema parnoki la shimtet.

Kathmandu nung curfew ano magien lir aser sepatem mapa lemozüka lir. Lanurtemi lungkak aitdang sorkar kiojen, yimtenren lennir kitem aser parliament nung mi senoktsü.

Nepal sorkari social media nokdangba ajanga lanurtemi lungkak aittsü tenzüka liasü. Ajisüaka lanurtemi ochimashi, tejak repringtepba aser yimtenren lennirtem temaba jenjang nung aliba ken o tem benoksemer tuluba nung lungkak aita liasü. Lendong

balala nung nisung 19 taküm sama aser noklang aika yirua lir.

Sushila Karki-i 2016 nung otsü tasen ka yanglua liasü aser ibaji la Nepal nung mezüngbuba chief justice akümba liasü. Ajisüaka 2017 nung MP temi la anema impeachment motion ka benoka liasü aser la mapa nungi anentsü.

Sorkari police tekolak shimba lemtet Karki-i magizük aser iba inyakim ya seniority meprangi inyak ta lai tai tonglokttsü.

Sushila Karki ya June 7, 1952 nü Biratnagar, Nepal nung ao. La Tribhuvan University (1978) nung Law azüng aser Banaras Hindu University (1975) nung Political Science azüng.

Karki-i Supreme Court nung justice, senior advocate, aser law professor mapatem inyakogo.

Lanurtemi Karki meshim dang Kathmandu nung lanur mayor Balendra Shah-i interim government anitsü akok ta jembia liasü.

## RMSA-2016 tesayurtemi Civil Secretariat nungi lungkak aittsü



*RMSA-2016 tesayurtemi Hombar nungi lungkak aitba noksa nung angur.*

**Kohima, September 10, 2025**

**(TYO):** RMSA-2016 batch tesayur 367-i parnok tesem melenshia asüng nungi Civil Secretariat nung lungkak aittsü metetdaksüogo.

RMSA-2016 tesayurtemi Hombar nungi lungkak aitba shilem tanabuba tenzüka liasü aser tang sentong nung tetsütemi kinü tanurtem anir shilem agidar.

Supreme Court-i tetuyuba agütsür mapang talangka süiaka Nagaland sorkari mapa meinyakba atema tejashi nung tesayurtemi lungkak aiter.

"State sorkari Special Leave to Appeal atema petition benokba May 20 nü Supreme Court-i magizük.

Iba ya March 16, 2022 nü Gauhati High Court, Kohima obendang aser tetuyuba nung ajemdaker agütsüba liasü" ta Nagaland RMSA Teachers Association, Renbemo L. Patton-i ashi.

Department of School Education-i August 14 nü review petition ka benokogo ta shia iba onük atsülangtsü meranger ta pai ashi.

Samagra Shiksha-i aremzüka atatsü aser tesayurtem dang lungkak aitba anentsü temepishiba ka dak alaka sorkari ola madoker. Iba jagi Association-i sentong tuluba agütsü atema Directorate of School Education nungi Civil Secretariat-i tesem

melener, ta Patton-i ashi.

"2010-13 RMSA batches nungi tesayurtem regularize asüba ama onok-a state cadre nung anioktsüla aser High Court-i obendang agütsüba ama scale pay agütsütsüla" ta paisa ashi.

Sorkar nungibo telangzüba mali saka civil society organizations, village councils, kaketshir teloktem, aser state law federation-i onok pusema nungitba metetdaksüogo ta RMSA-2016 tesayurtemi ashi.

"Onoki lungkak aitba manentsü aser sorkar taruba anogo ishika tsüngda telangzüba magütsüra lumia lungkak aittsü" ta Patton-isa ashi.

## Assam cabinet-i özüng alema arurtem meindoktsü SOP agizük

**Guwahati, September 10, 2025**

**(TYO):** Assam Cabinet-i Mongulbarnü Immigrants (Expulsion from Assam) Act, 1950 mapa tenzüksü atema standard operating procedure (SOP) agizükogo.

Iba Act ajanga özüng alema arurtem jangjaba aser meyipa yokba mapa tajungba inyaka otettsü.

SOP kübok District Commissioner (DC) kati bendanger ta asüba nisung nem expulsion Order agütsütsü tashi agütsür.

Iba Act ajanga DC-i bendanger ta temulung melemi bilemer nem anogo 10 nü notice ka agütsütsü aser iba mapang tsüngda pa/lai senso kuli magütsüteter, DC-i idangjisa nisungtem meyipa yoktsü tetuyuba agütsütsü.

Iba sülen bendanger nisungji holding centre ka nung ayutsü aser

BSF-i meyipa yoktsü. District Commissioner-i mekoktetba ken o kar ajurura Foreigners Tribunal dangi abentsü.

Assam telungi özüng alema arurtem ghonda 24 tsüngda putetra notice magütsüi dang meyipa yoktsü.

"Yaküm Supreme Court nung Constitutional Bench kati Citizenship Act nung Section 6A nung ajemdaker Assam sorkar dang bendangertem putettsü aser meyipa yoktsü atema 1950 Act amshitsü temelaba agüja liasü" ta Chief Minister, Himanta Biswa Sarma-i ashi.

Police mesüra tangar nungi özüng alema aruba nisung indang osang angazükba sülen District Commissioners (DCs)-i item nisung dang anogo 10 tsüngda senso kuli agütsütsü tetuyuba agütsütsü.

Parnoki kuli agütsüba nung

temulung mesüra DC-i bushitetbaji zülüoka ayutsü aser iba nisungji 'illegal immigrant' ta züngoktsü.

Iba sülen DC-i 1950 Act nung Section 2(a) kübok expulsion order ka agütsütsü aser iba nung nisung dang ghonda 24 tsüngda Assam toktsür aotsü mapang atakzüka agütsütsü.

Foreigners' Tribunals ajanga jangjateta aliba Declared Foreign Nationals (DFNs) atemabo kuli kecha mebushitepi dang meyipa yoktsü.

Özüng alema arurtem meyipa meyokdang Foreigners Identification Portal nung biometric aser demographic details bendentsü.

Zero line anasa mesüra Assam telungi aiter ghonda 12 tsüngda putetba nisungtembo maparen kecha meinyaki idangjisa meyipa yoktsü.

## FNT indang comprehensive draft ka renemtsü nangzük

**Dimapur, September 10, 2025**

**(TYO):** Frontier Nagaland Territory (FNT) atema Mongulbarnü Ministry of Home Affairs, Government of India, Nagaland sorkar aser Eastern Nagaland Peoples' Organisation (ENPO) tsüngda

Chumoükedima nung aliba Police Complex nung parnok tsüngda senden pezübuba amen.

Ghonda asem senden amendang onük aika benoka lemsatet aser Home Ministry

teloki tekaratiba nung FNT atema comprehensive draft ka renemtsü aser iba sülen taruba High Level Committee senden amentsü nangzükogo ta ENPO-i sangdong ka nung ashi.

Home Ministry telok ya Advisor, Northeast, A. K. Mishra lenisüba kübok Joint Director (IB) Rakesh Kamble aser Dy. Director SIB Nagaland Vineet Kumar nunger liasü.

Nagaland sorkar tenüng nungi Chief Secretary Nagaland

Sentiyanger Imchen, Home Commissioner Abhijit Sinha, Commissioner Nagaland Gregory Thejawelie, Finance Commissioner Kesonyu Yhome, Principal Secretary Law & Justice Kikheto Sema, Special Secretary Home Limasunep, OSD Finance Department Ketuo Metha, Secretary Work & Housing John Tsulise Sangtam aser Dy. Secretary Home Benjamin Longkup nunger aden.



## Kohima nung Safe Food and Healthy Diets senden amen



Kohima nung Safe Food and Healthy Diets indang DLAC senden amenba noksa nung angur.

**Dimapur, Rongjui/Sept. 10 (TYO):** Deputy Commissioner, Kohima, B. Henok Buchem, NCS lenisüba kübok District Level Advisory Committee (DLAC) for Safe Food and Healthy Diets indang senden ka September 10, 2025 bnü Deputy Commissioner, Kohima indang Conference Hall nung mena liasü.

Iba senden nung Task Force Committee on Food Safety tentetsü pangjem, kong stakeholders aser nüngdakba department nungi nübu tejangja shimoktsü.

Iba committee yagi

chiyongtsü aser public health dak sendakba inyakyim reprangtsü. Hotels, restaurants aser food establishments nung chiyongtsü tajung ayutsü tongtipang, ta iba senden nung jembia liasü. Sorochoikda aser chiyongtsü ayudak tesem müreka ayutsü nüngdaker aser chiyongtsü tajung amshitsüla, mapang liwar ayokba chiyongtsütem kanga junga mittsü jembia liasü.

Water certification indanga parnoki jembia liasü aser hotel, restaurant aser chiyongtsü ayokdak tesem ajunga nung

water testing certification alitsüla, ta jembia.

Chiyongtsü amshiba tesem ajunga nung iba certification ya alitsü aser mapang shia tzü tendanga amshitsü jembia.

Ano labeling shidak mali bendang lima nungi tejangja maliba chiyongtsütem FSSAI tag makai ayokba tebilemtsüa benoka jembia liasü aser item chiyongtsü ya nüburtam asoshi majung lir ta jembia liasü.

Parnokisa nüburtam, vendors, hotels aser restaurants atema awareness campaigns agitsü pangjema liasü.

## NPF-i India tatong tir nem tenüngsang agütsür

**Dimapur, Rongjui/Sept. 10 (TYO):** Naga People's Front (NPF) ajanga India indang 15 buba tatongtir shimba asoshi tenüngsang agütsür, ta NPF tir Apong Pongener-i C. P. Radhakrishnan dangi shiti ka zülua liasü.

September 9, 2025 nü election nung nai takok anguba

ajanga Electoral College-i nüdak tamang akaba sayur, ta ashi.

Na tajangshiba jenti aliba aser Maharashtra indang Angh ama inyaka nüburtenzüka aruba yimyatem ajanga Vice President indang office aser Rajya Sabha inyakyim nung tajangzük tulu alitsü.

Nü lenisüba kübok

constitutional values aser parliament yimyatem tashi itshitsü aser asen linük telungjem asoshi tongtipang "unity in diversity" akangshitsü nüdak tamang akar, ta ashi.

Nai iba khuret tulu benzüka inyaktang anema aliba aser temoatsüba südakjang ta moatsür, ta NPF ajangasa ashi.

## Wokha DPDB senden menogo, Banana Festival anogo lemtet



Advisor, Mhathung Yanthan-i 10th September 2025 nü DPDB senden Wokha nung jembidang tangokba noksa angur.

**Dimapur, Rongjui/Sept. 10 (TYO):** Wokha District Planning and Development Board (DPDB) ita shia amenba senden September 10, 2025 nü Deputy Commissioner, Wokha indang Conference Hall nung mena liasü. Iba senden ya Deputy Commissioner & Vice Chairman, Wokha DPDB, Vineet Kumar, IAS lenisüba kübok amen, kong Advisor, Agriculture, Mhathung Yanthan aser MLA Mhonbemo Humtsoe den department balala nungi tekolak tem dena iasü.

Iba senden nung Banana Festival indang jembia, koba October 22 & 23, 2025 anogotem amungtsü lemtet. Ibai Wokha district nung Banana Festival mezüngbuba alitsü aser aluyimba tsütsü yimya tasen amshidaktsütsü aser local produce temaba jenjangi

ajungketa market linkages tashi itshitsü nükjidong nung iba benjong ya ayongzük.

Committee aser Department balalai iba benjongmung asoshi terenemshiba balala indang osang agitepa liasü.

Taoba senden nung lemteta aliba osang agitepa iba senden tenzük aser Wokha nung amenoka aliba Myanta Okho Society registration atema jembir temaba ketdangsür dangi aben.

Advisor Mhathung Yanthan-i Government e-Marketplace (GeM) indang onok benok, koba Ministry of Commerce and Industry ajanga semzükba online procurement platform ka lir.

GeM tajungba nung amshitsü asoshi training agütsütsü aser public awareness agütsütsü nüngdaker

ta pai ashi, kong government entities asoshi ochishia lijaliyonger.

Iba sapang yagi MSMEs, startups aser tetsür entrepreneurs tem yarir aser Digital India aser Make in India den lirumedema inyaker.

Maneni Inter-Departmental Sports atema committee ka tentetsü indang jembia liasü.

Senden nung Dr. Motsuo Memorial District Hospital nem Ministry of Health and Family Welfare, Government of India ajanga Kayakalp Awards tanabuba jenjang agütsüba osang Medical Superintendent Dr. N. Mhonchan Kithan ajanga lemsatepa liasü. Ibai Swachh Bharat Mission kübok mürekmejuba aser tashidak menatepa aoba azüokba nung tatishitsü tajung sayua inyaktetba temaitsü agütsüba lir.

## Dimapur Press Club ketdangpur tasen shimogo

**Dimapur, Rongjui/Sept. 10 (TYO):** Dimapur Press Club (DPC) lokti senden September 10, 2025 nü E-Space, Dimapur nung mena 2025-2027 kümsük asoshi ketdangpur shima liasü.

DPC tir asütsü Henlly Phom shim, tatong tir atema Bendangchuba aser tongti zülur atema Kanili Kiho shima liasü.

Joint Secretaries ama Pur Longkumer aser Nzano

Humtsoe shim, Information Secretary atema Prasanjit Dutta aser Finance Secretary atema Talimongla Longkumer shima liasü.

Maneni Dilip Sharma kimen aser executive züngsemtem Honikali Lohe, Imkong Walling aser Asungba Ao alitsü.

Mapa melenoktsüba sentong ya September 17, 2025 nü agitsü.

## Ticket to Hornbill sentong October ita agitsü

**Kohima, Rongjui/Sept. 10 (TYO):** Bodhbarnü Task Force for Music & Arts (TaFMA) ajanga sangdong ka nung Nagaland nung 26 buba Hornbill Music Festival taküm December ita ayongzüktsü renema lir ta sangdonga "Ticket to Hornbill"- India's Biggest Band Battle sayaogo.

Iba sentong nung senpet sen 4 million agütsütsü, anungji linük aser bendang lima nungi sempet tajung alirtem atsür arutsü imlar.

Ticket to Hornbill ajanga India aser alima tesem balala nungi kentener teloktem register süa iba tetoktepba nung shilem agitsü ayongzük.

Iba tetoktepba nung takok angur temi Hornbill Music Festival nung shilem agitsü maongka angutsü.

Taküm Ticket to Hornbill nung Presenter ka ama aruba

atema TaFMA chairman Theja Meru-i Bhikharam Chandmal dang pelaba lemsatepa liasü.

Tejakleni aotsü atema corporate teyari ya kanga tongtipang lir ta pai ashi.

Paisa Department of Tourism, Audio Partner - Sennheiser aser Official Beverage Partner - Coca-Cola dang pelaba lemsatepa liasü.

Nagaland Chief Minister Dr. Neiphiu Rio-i Nagaland ya alima sapang nung ajungkettsü mangdang aliba den lirumedema iba music platform ya agütsür, ta Meru-i ashi.

Ticket to Hornbill ya October 16-18, 2025 anogotem Kohima nung alitsü aser iba tetoktepba nung shilem agitsü jangra aliba kentener telok temi www.hornbillmusicfestival.com nung register sütetsü, ta paisa ashi.

## Mokokchung Police-i miim mozü abener 2 apu

**Mokokchung, Rongjui/September 10 (TYO):** Mokokchung Police-i August 27, 2025 anogo carton box 2 nguteta tera temelung melemteni bushitsüngdangdang merang tobacco container 3 nung miim mozü Opium(kani) teozük 78.52gram ngutet.

Iba maparen dak sentakba nung Mokokchung Police-i arishi küm 32 tain Hanuman Bhadu S/o Laxman Ram Bhadu V/O Nokha, District-Bikaner, State -Rajasthan, P/A Mongsenbai Ward

Mokokchung aser arishi küm 36 tain Diparam S/O Kumbharam, V/O Shekhasar P/O-Kakhkoo, P/S Panchu, District-Bikaner, State - Rajasthan, P/A Mongsenbai Ward Mokokchung Tenaya puogo ta Addl. SP aser PRO Mokokchung ajanga sangdong ka nung metetdaksü.

Kasa sangdong nungsa Mokokchung Police-i NDPS Act kübok ana tanga case 2 züluka tang bushitsüngdang agidagi ta metetdaksü.



MEA-i India nungertem dang Nepal-i maotsü metetdaksür



Mahrajanj district (UP), September 10, 2025: Nepal nung lanurtemi longkak aita sorkar atsüngdokba sülen tensa raksar lia Uttar Pradesh kübok Mahrajanj district nung sepaitemi arrtsü anükba noksa nung angur.

**New Delhi, Rongjui/ September 10 (Agencies):** Tang Nepal linük nung tensa mejungi aliba nung ajemdaker Bodhbarnü Ministry of External Affairs (MEA)-i sensotem dang Nepal-i maotsü tekümdangtsü osang metetdaksüogo.

MEA-i sangdong ka ajanga India nungertem dang, nüngdak tulu melira tensa mesüngjem tashibo Nepal-i maotsüla, ta metetdaksü.

Iba dak alia MEA-isa tang Nepal nung oa aliba India nungertem danga kidang nungi mayazüktsü aser Nepal ketdangsertemi tuyuba aser Kathmandu nung aliba Indian Embassy-i tuyuba ama inyaksü metetdaksü.

MEA-isa sensotem den emergency contact numbers

lemsatepogo. Teyari balala atema Nepal yimtiba Kathmandu nung aliba Embassy of India den tongteprateptsü asoshi contact numbers: +977-980 860 2881 (WhatsApp nunga angutsü) aser +977-981 032 6134 (WhatsApp nunga angutsü) lemsatepogo.

MEA-i, "Tang Nepal nung aliba India sensotem dang pei aliba tesem/kiojen nungi mayazüktsü aser akokba tashi kümdanga alitsü metetdaksür," ta metetdaksü.

Bodhbarnü sorkaria Cabinet Committee senden ka mena Nepal tensa atema o lemtepogo. Ato kilonser Narendra Modi-i Punjab aser Himachal Pradesh na nung tzümetsüng agi kongshiba tesemtem semdang aser pa

meyipa aruba sülen Cabinet sendenji amen.

Ato kilonser Modi-i X ajanga, "Tanü Himachal Pradesh aser Punjab na nungi meyipa aruba sülen ni Cabinet Committee on Security den senden mena Nepal tensa atema jembiogo. Tang Nepal nung tatalokbatem ya tejashitsüka lir. Lanur aika taküm samaba atema jashir. India atema Nepal nung yimjung aser azükaruji kanga tongtibang. Nepal nung aianu aser adianutem dang yimjung pusemstsü ni ayongzüker," ta metetdaksü.

Hombar nungi Nepal nung lanurtemi sorkar anema longkak ait aser rara tulu adoka lanur 19 asüba sülen Nepal Ato kilonser KP Sharma Oli-i menden nungi anenogo.

Wangchuk-i Ladakh atema state jenjang khanga longkak ait tenzükogo

**New Delhi, September 10 (Agencies):** Climate activist aser Ramon Magsaysay award angusang, Sonam Wangchuk-i Ladakh atema state jenjang takhangba agüja Bodhbar nungi anogo 35 lumia longkak ait tenzükogo.

Leh nung osangbenertem den jembidang Wangchuk-i, Union home ministry-i aiben iba atemaji jembitsü nangzükogo saka ita ana jungnüa ozü lenirtem den senden ayongzüka mamaner, ta ashi.

"Onoki akhangba ataloktsüsa senden amenba mapang nung sorkari senden ayongzüka anenadokogo," ta pai metetdaksü.

Union sorkar dang Ladakh ya linük temzüng kübok Sixth Schedule nung züngoktsü aser state jenjang atema parnoki takhangba agütsür.

Wangchuk-isa, taoba council election mapang nung ruling Bharatiya Janata Party (BJP)-i Ladakh nem Sixth Schedule jenjang agütsütsü ta nangzüka liasü, anungji taruba election agitsü lia BJP-i iba tenangzükbaji akhümtsübutsüla, ta ashi.

Leh Apex Body-i yimsü balala nungi sarasadem sentong ka ayongzüka agiogo. Parnoki longkak aitba ya yimjung nung dang agitsü aser linük temzüng kübok agitsü, ta shiogo.

Parnoki longkak aitba

maparen nung Gandhi asoba anogomong, October 2 ya "alizüng anogo" asütsü, ta metetdaksü.

Leh Apex Body aser Kargil Democratic Alliance (KDA) nati senteper tesüiba ita aika Ladakh nem state jenjang agüjang, ta takhangba agüja arur.

Taküm küm tetenzüklena Wangchuk-i item takhangba agüja lumia longkak aita liasü saka home ministry-i iba atemaji lenirtem den senden ayongzüka jembitsü ta nangzüka sülen pai longkak aitba anen. Ajisüaka tesüiba ita ana jungnüa sorkari lenirtem den senden ayongzüka mamenba agi pai asentenshir longkak ait tenzüker.



September 10, 2025 nü Mathura nung tzümetsüng lendong agi kongshirtem nem chiyungtsü densema teyari balala agütsüba mapang BJP MP, Hema Malini-i tanur ka den jembidang tangokba noksa nung angur.

Nepal nung atalokba ama linük mashie nunga ataloktsü: Sanjay Raut

**New Delhi, September 10 (Agencies):** Nepal nung lanurtemi longkak aita sorkar atsüngdokba sülen Shiv Sena (UBT) lenir, Sanjay Raut-i Ato kilonser Narendra Modi aser BJP aitsüba olen ka nung, Nepal nung atalokba amaji linük mashie ka nunga ataloktsü akok, ta ashi.

Raut-i X ajanga Nepal yimtiba, Kathmandu nung lanurtemi longkak aitba aser kiojen rongdoktsüba video ka lemsatepa, "Tanü Nepal nung yamai ataloker. Iba ama tensa ya linük mashie ka nunga ataloktsü akok. Kümdangang! Bharat Mata ki Jai, Vande Mataram" ta metetdaksü.

Pai iba osang nungji Ato kilonser Modi aser BJP na 'tag' asü. Nepal nung sorkari social media nokdangba aser ochimashi anema lanurtemi longkak aitba mapang nung lanur 19 asü aser nisung 500 dak tali yiruba sülen Nepal Ato kilonser KP Sharma Oli-i menden nungi anen aser linük nungi jenogo.

Raut-i X ajanga iba osang tenzükogo.

lemsatepba sülen social media nung o entep tenzükogo. Pa pusemertemia ochimashi anema tekümdangtsü lemsatep aser pa aitsürtemibo, iba ya tensa raksadaksütsü atema ajungshiba o lir, ta aitsü. Nisung ka tenüng agi, Alok Ranjan-i Sanjay Raut aija, "Iba ya amokmeren asü, asalentong ka asü, mesüra tekümdangtsü o? Nü nükjidongji yangi India nungbo mataloktsü, ta nai metettsüla," ta metetdaksü.

Ano nisung ka tenüng agi, Sunny-i social media ajanga, "Nai India ya Sri Lanka ama bilemer asü? Merangdangang aser reprangdangang, onoki India masü saka Lanka ang rongdaksütsü," ta metetdaksü.

Nepal nung tensa raksaba den Modi sendaktepja Raut-i India nung nüburtem tejashi sendokba lemsateper. Raut-i, "Iba ama tensa ya linük mashie ka nung ataloktsü akok," ta jembiba sülen opposition aser ruling party tsüngda aitsütep

DIMAPUR DISTRICT AO PENSIONER TELUNGJEM SENTEP SENTONG

Anogo : 19th Sept. 2025 (Friday) Mapang : 10:00 AM  
Tesentepdak : DABA, TOWN FELLOWSHIP, KHER MAHAL

Sentong Anir : Wt. Akümla Imchen, Duncan  
Onük Jembir : Wb. K. Temjen Jamir  
Editor, Tir Yimyim

Sentong Tarensen

- Telok Ken : No. 233 "Khrista Teka Nung Metaloker"
- Sarasademtsü : Wb. N. Lanu Aier, Kimen DDAPT
- Tayongzükbka O : Wb. L. Sosang Jamir (Rtd.) DC Judicial (7 minutes)
- Temeja Ken : Lengrijan Ao Pensioners I/C.i) Wt. Asangla Aonokpu ii) Wb. Chubaangshi Mopungchuket
- Onük : "Shi aser Tanela nung teintet rogo khümkhümshiba" (25 minutes)
- Tepela aser Melepzüng O : Wb. Imti Lkr. President DDAPT
- Tatem Sarasadem : Telok

METETDAKTSÜR

- Aor Pensioner/ Family Pensioner ajak iba Sentep Sentong nung kirep arua adentsü ayongzüker.
- Sentong temer lokti süngo ajemba mapang alitsü.
- Iba sentong takok aser temoatsü asoshi sarasadema atadi.

DEBTS RECOVERY TRIBUNAL GUWAHATI  
Government of India, Ministry of Finance  
Suwarna Bhawan, House No. 12, New Town Path, G.S. Road, Ulubari, Guwahati- 781007

CERTIFICATE DEBTOR (S) NEM DEMAND NOTICE AGÜTSÜR  
(See Sections 25 to Section 29 of the Recovery of Debts and Bankruptcy Act, 1993 and under Rule 2 of Second Schedule of the Income Tax Act, 1961)  
D.R.P.C. NO. 3102 DATED 02.11.2018  
State Bank of India - Vs- Sri Nesucho Kezo

To,  
Sri Nesucho Kezo, S/o D. Kezo, Behind Petrol Pump, Mission Compound Colony, Phek Town, Phek District, P.S.- Phek, Nagaland- 797108. (Certificate Debtor).

15.10.2018 i anogo nung Case No. O.A. No. 92 of 2018 angadangba mapang nung Ld. Presiding Officer-i agütsüba Recovery Certificate nung ajemdaker tsünglanglen tejangja shia aliba ama na anema sentsüh Rs. 33,86,838.21 (Rupees Thirty Three Lakh Eighty Six Thousand Eight Hundred Thirty Eight and Paise Twenty One only) lir.

- |                                                         |                  |
|---------------------------------------------------------|------------------|
| 1. Certificate nung shia aliba sen:                     | Rs. 29,68,901.00 |
| 2. 21.03.18 nungi 31.12.18 tashi nung interest @ 13.50% | Rs. 3,25,677.21  |
| 3. Costs                                                | Rs. 92,260.00    |
| 4. Less: Amount paid by the Certificate Debtor          | Rs. -----        |
| Total :-                                                | Rs. 33,86,838.21 |

2. Iba notice agütsüba sülen anogo 15 tsüngda temalen shia aliba sentsüh agüjang ta nü dang tuyur, mesüra Recovery of Debts Due to Banks and Financial Institutions Act, 1993 kübok Sections 25 nungi Sections 29 tashi aser Income tax Act, 1961 nung Second Schedule kübok Rule 2 nung ajemdaker sentsüh alangzüksü atema inyaksangshitsü.

3. Temalen shia aliba sentsüh dak alia nai item sen-a agütsütsüsa akümtsü (a) Recovery certificate (DRPC) No. 3102 dated 02.11.2018) nung aliba ama recovery certificate agütsüba anogo nungi tenzüka date of realization tashi nung interest, aser (b) Notice aser warrant den külemi sentsüh alangzüksü atema inyaksangshidang indokba costs, charges aser sen teindokba ajak agütsütsüsa akümtsü.

October 23, 2019 anogo nung kü meyongnem aser iba Tribunal seal agütsür.  
(K. MUKHEREJEE)  
Recovery Officer II





## TIR YIMYIM YIMOBILEM (EDITORIAL)

DIMAPUR THURSDAY, SEPTEMBER (RONGJUI) 11, 2025

### Tsümarî asenok merametsür

**T**anü asüng ka nungi tenzüka, talisa, Dimapur aser Niuland nung tsümartemi asenok lisopurtem aküm metsübuî merametsütsü tenzüko. Aji oda, aonsutsü ayokdaka joko aonsutsü ayoker tsümartem den jenjang asoshi alulangtepa jembitsüla masü, parnokang tesashiba arur aser asenok dak teka sangshitsüa marendaker. Iba amaji tesem balala nung tsümartemi Naga nunger tsürabur aser lanurtem dak teka ia yirutsüba angur. Iba ama tatalokba ya anogo shia tesem balala nung atalokdagi saka tatalokba kar yimjak nung atalokba metetba dak alaka asenoki memetetbatemang teimba atalokdagi ta bilemdi. Ibai ajungbena meimlaba mapatem ataloker masü saka tamalen nungi asenoki jembia arubatem asangsang nung tanü atalokba mapatem lir. Alima nung ya ali madak yangji kibur kuma alitsübaî kecha meinyaki chiajema aliba purtem masü saka mapa inyakerkemang kibur kuma alir. Ajisüaka, asenoki alibo tuluka aginer saka mapabo meinyakner, anungji ali nung jagi chiyongtsü züsentsü aser tagitarutsü adokdaksütsü asoshi tangar bendanger tsümartem anir arua inyakdaksür. Asen lima tenemlenbo alu kangabo mayimer, iba jagi tsümartem alu nung masü saka town shia nung shishilembadak dokan ajak parnok meyong ser parnok tayoker aser asenok talir ta parnokang kibur aser asenokang bendanger ama alir. Ajisüaka, asenoki aji memeteter aser asenokang parnok dang nungi jenjang temaba aser takaba nung alir amai asenoki bilemer. Iba jagi asenoki memeteti asenok government mapa nungi ita sen anguba aser anogo shi ayangba sen ajak tsümartem nem agütsür. Iba sen jagi parnok Rajasthan nung, kar Bihar nung aser kar Assam nung ta asen ki dang tajungba aser asen lu aser ali dang tuluba alia mapa inyaker. Kasaji, asen lima lendenlena asenok lisopur li aser alu nung tsümartemang yua lir. Tsümartem asoshibo ali tilaka danga lira, aji taküm, yangji lia alu ayimtsü aser iba jagi kibong rangben nungdak peridaksütsü. Ajisüaka, asenoki ali agi shitakba rongsen kuma janratema lia aotsü memetet aser metetyonga meinyaker, anungji asenok tsümartem dakji metaloker alitsüsa akümer. Aji oda, lia lia asenok ya joko tsümartem meliang asenok taküm melitetsüsa kümogo, kechiyong tsümartemiang asenok lu yimtsür, asen li anüker aser mapa ajak parnoki inyaksür. Ibaji parnoki meteta lir aser yamaji parnoki jembir. Iba jagi asenok ya parnok tsüngdang kecha memetetba tanur amai ka dang parnoki bilemer. Tanü asenok iba tia jenjang nungji lir. Joko, tesem kar nungbo tsümartem nem alu yimdaksü tenzüker, parnokbo yangji lia nütsünga asenok dang nungi kanga agia teimba kümogo aser alu nung züsentsübatemjia parnoki asenok kiburtem nem kechi agütsüdir ojang ta asüba tia ka nung parnokang kibur aser asenokang tayimer kümer asenok parnok kübok lidagi. Iba jagi parnoki asenok nüken metsübuî. Aji oda, lia liabo, ashiko, parnoki asenok alu kiburtema alu jagi marudaksüi parnok meyong akümstüsa akok. Iba ama mapang ka nung, Nagaland tenemlen dang masü saka lendenlen dena tangar bendangertem Nagaland nung arua amongtsü temelaba 'Inner Line Permit' nungdaksüsa özüng latetba ya menur süaka kanga nungdakba mapa ka inyaksü tenzüko. Iba nungdakji meteta Naga nunger ajaki pei kidang alir aser pei lu nung mapa inyakerkem shia ket nung ILP alitsübaî kanga tongtibang ta angatetsüla. Joko, asenoka tang tsümartemi asen nüken metsübuî mezügmeshitsü tenzüka ya asenok asoshi lendong mapang ka tenzüker ta meteta, akok tashi parnok medeni asenok litettsüsa asenok ajak mapa inyaker kaka kümadoksüla. Atangji, asenok daka tashimait aika lir, kechiyong asenokia bendangertem mezügmeshir aser parnok aliba agi asenok alir ser nung, parnokbo nisung masü amai asenoki beshir, iba ama jakla tamajung asen dak keta alibatema asenoksasa melenshitsüla aser bendanger – lisopur ta masü saka nisungbo kati ka akümstübutepa alitsüla, kechiyong ajak nisung aser nisungi akümstübutepa aginer.

## OLEMSABANG

### Ali Oset Bendenba Agi Taküm Maitsü Yanglutsü Merangba Putu Ka Nung Tamanger Jenjang (The Fate of a Believer in a Culture of Consumerism)

~Tiatoshi Longkümer, Kohima

#### OTSÜ KA

Kenü ojala ka kü office-i ni bushia aru. La tejak shimak-shimaker aser tereprangtsü nung shisabulu tulu ka bener ali ama ni reprangtet. Ni la pelashishia agizüka menden ka nung mendaktsü aser khen süngjemdaksür külen la kechi nungdak atema aru aji asüngdang. Idangji lai ashi, "kü jalai la sasa soseta asütsü ta ashir." Kechiba jalai la sasa soseta aünür ta ni ano asüngdang. Ojalai langzü, "jalai kanga dang jenjang tasak phone ka meshir. Saka tebu künatî aji alitsü makoker. Aser ano la phone amshira lesson nung kanga temulung magütsür aser marks kanga achema angur. Anungji tebu kenati jala dang item khuret ajakji shia lai meshiba phoneji tangbo alitsü makoktsü ta ashidang lai phone-ji malitsüra la sasa soseta asütsü ta ashi." Atangji jala amokmeren o jagi la kanga shisabulua khuretji lemsateptsü aruba liasü.

Jala azüngba high school ya student-tem rongnung kanga jaksatepa sübosolemtsü, phone, aser ali oset balala agi kaketshir rongnung kanga toktepa sayutepba kaketriju ka lir. Aser shiri tasenba aser tajungba amshir parnokji sapua tenung tetshir. Aji oda, parnok asoshi parnok ket nung aliba oset aser süoshi jagi parnok shiba aji jangjatsür ama bilemba telok. Anungji jalai-a phone jenjang tasak ka amshiba jagi tangar nem la metetdaksünua bilema tsürabur dang phoneji meshi. Aser tsüraburi kodang aji agütsütsü memulung idangji lai la sasa raksatsü bilema rara. Ali oset agi taküm maitsü (identity) yanglutsü merangba dang ya consumerism ta ajar. Ao oshi nung iba ojang meyiptsü makokba agi ni "consumerism" ta dang iba ocet nung amshir.

#### CONSUMERISM YA KECHI?

Tanü putu nung tayokba oset aika bendentsü kanga bilemba aser item oset aika akaba ajanga taküm nung tepela tulu adokdaksür aser taküm jenjanga tajungba ajungketer ta amangba dangji "Consumerism" ta ajar. (English nung, Preoccupation with the acquisition of consumer goods and the belief that these possessions constitute the greatest good and the highest value in life). Tongmelang agi, consumerism tetezü, ali oset bendenba, aliba mesüra nungdakba dang nungi tali alidena bendenba yimya sübapba liba-liro dang ajar.

#### CONSUMERISM TERA ASEM:

Iba ama liba-liroba yimya ya shilem asemsü nung angatetsü akok (3 things to understand consumerism): Mezügbuba nung, sen aser oset-tzüset aika akabaji taküm nung takok temaitsü aser iba yagi asen taküm jenjang tajungba sayuba temaitu ta bilemba shisatsü. Na aika kara tangari na jenjang temaba nung akhümstübuia agizuktsü ta pei sasa temolunglema bilemba. Tanabuba nung, sen aser oset aika akabaji ajanga asenok anisungzük tepela angur ta belemba. Atangji, dokani oa shishilemba (shopping) mesüra online nung shishiba ajanga taküm jangratemdaksüba. Tasembuba nung, teshimtettsü tapu aika (choices) lira ibaji asenok kija ajangzüktsü asoshi tajungba ta bilemba. Item yimya ajak ya ali oset-tsüset aliba aser akaba nung tepela bushiba sobaliba inyakyim (culture of consumerism) nung dena lir. Saka yangi bilemdangtsü kaji, taküm nung alima oset-tsüset aika akabaji tematiba jenjang ta bilemba tangatetbaji tai lir. Mark 8:36 nung, "Kechiaser nisungi alima ajak ajangzüker, pei taküm samara, kechi ajangzüktsü? Mesüra nisungi pei taküm melen kechi agütsütsü?"

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerî angateta agitsü mepishir**



AGWM-i osangtajung agi mayimjemba nütsüng 42 atema inyaktsü



2025 Assemblies of God General Council nung AGWM Executive Director, John Easter-i jembidang tangokba noksa nung angur.

**September 10, 2025:** Assemblies of God World Missions (AGWM)-i alima nung Khrista osangtajung agi mayimjemba tesemtem aser osangtajung mangashidangba teloktem ayimjemtsü atema mission mapa tuluba atemzuka inyaktsü nangzükogo.

August 4-8 anogotem nung Orlando, Florida nung 2025 Assemblies of God General Council aliba mapang nung lenirtemi iba mission inyaktsü telemtetba agia liasü.

Alima tesem ajaklen Tsüngrem O atema tzürar, anungji Khrista osangtajung mangashidangba tesemtem ayimjemtsü atema onoki asentenshir tenangzükba agir, ta lenirtemi metetdaksü.

September 05, 2025 nü AGWM Executive Director, John Easter-i, iba organization tenzükba sülen tesüiba küm 70 tsüngda iba mapatong ya tulutiba asütsü, ta metetdaksü.

Pai, "Iba mapatong ajanga asen putu mapang nung tanelar alu tulutiba aruhba ajangashitsü ta onoki amanger," ta metetdaksü.

AGWM-i ashiba agi, tang alima nung nütsüng billion 8.23 nungi nütsüng shilem 42-ibo Khrista osangtajung mangashidang, aser osangtajung mangashidangbapurtem rongnungji Europe kija nunga nisung million 500 lir.

Iba nungjagi million 202 bo Unengaged Unreached People Groups (UUPGs) 2,085 nungi lir; parnok Tenla ki mali, missionary tem mali mesüra tamangertem-a mali, ta AGWM-i metetdaksü.

"Parnoki Khrista osangtajung magizüker masü, saka mangashir," ta AGWM-i ashi.

Easter-isa, "2023 küm ni Executive Director akümba mapang nungi ni iba khuret ya angateta dang liasü," ta metetdaksü.

Paisa, "Alima nung Khrista osangtajung mangashidangba nütsüng shilem 42 atema küm 20 tashi Tsüngrem dang leniba meshia liasü. 2024 küm October ita nung Nairobi, Kenya nung

Superintendents aser mission directors noklang aika adenshia senden aliba mapang nunga iba atemaji jembia liasü," ta metetdaksü.

Easter-i, "Iba tejashi ya kü melungjang nunga liasü. Ni ajak dang yamai ashi, 'Shilem lir-ana (42). Asenoki iba ya küm 20 tashi jembia aruogo. Asenoki nütsüng shilem 42 atema kodang apusotsü aser shilem 41 kümdaktsütsü? Asenoki shilem 42 atemaji maparen tenzükba sülen kodang shilem 40, mesüra shilem 39 mesüra shilem 38 kümdaktsütsü' ta ayongzuka liasü," ta metetdaksü.

Nairobi nung ayongzükba sentong nungji Assemblies of God General Superintendent aser World Assemblies of God Fellowship nunga vice chairman, Doug Clay-a liasü. Paia, rongdak süa osangtajung sangdongtsü atema Tsüngremer tajaba lir, ta ashi.

Doug-i, "Iba ya AGWM atema dang masü. Iba ya World Assemblies of God atema dang masü, saka Assemblies of God USA mapa lir - Laishiba den sendakteptsüla, Tanela tashi adentsüla aser Arogotemi mission nung shilem agiba ajanga osangtajung agi mayimjemba tesemtemi yoktsü atema jala-jabasotem adokdaktsütsüla," ta ashi.

"Tsüngrem tanela ajanga mapa inyaker. Asenoki tashi angatsü asü mangatsü?" ta pai asüngdanga liasü.

Easter-i AGWM leadership teams den iba tayongzükba lemsatop aser pai ayongzükba ama lenirtemia alima nung osangtajung mangashidangba nütsüng ajema kümdaktsütsü atema rangloker inyaktsü bangjema liasü.

Tamalen-a AGWM-i missionary 2,569 aliba nungi 2023 küm tashi nungbo missionary 4,000 yoktsü atemzuka liasü.

"Temelung nung iba mangdangji yur AGWM-i tanela chiyungtsü tenüngdaktiba tesemtemi missionary tem yoktsü, aser tanela tsütsü sendoka aliba tesemtem nung

Arogo tenzüktsütsü," ta AGWM-i metetdaksü.

"Alima tesem balala nung AGWM nung inyaktertem, parnok koba tesem mesüra koba yimya nung tenzuka lidir liaka parnoki osangtajung mangashidangbapurtem ayimjemtsü, aser iba atemaji rangloker inyaktsü," ta AGWM sangdong ajanga metetdaksü.

Linük tasen shia nung partner yanglur Arogo tasen tentettsüba, telok tilatem dak ranglokba aser temelung meyipdaktsüba ajanga alima nung osang tajung mangashidangba nütsüng shilem 42 ji ajema kümdaktsütsü, ta AGWM lenirtemi metetdaksü.

Easter-i, "Onoki iba mapatong tenzükba sülen AGWM puti otsü nung nisungtemi Tsüngremer tajaba agizükba tulutibaji asenok putu mapang nung angutsü atema onoki sarasademer," ta metetdaksü.

AGWM NextGen Strategist, Jacob Jester-i, iba mission atangji ataloktsü atema Generation Z (arrshi küm 13-30) lanurtemi tongti shilem ka agitsüla, ta ashi.

Paisa, Yisu osang mangashidangba nütsüng ayimjemtsü atema local Arogotemi item ama lanurtem rongnungi missionary tem adokdaktsütsüla, aser Amazon kintem nungi Arab lima nung Muslim kibongtem aser Asia tesem ajaklen Buddhist nungertem ayimjemtsüla, ta ashi.

"Puti otsü nung Gen Z ya generation tulutiba lir. Iba lanurtem den asenoki longjemer inyakra missionary temi kodanga mayaokdangba tesemtemi parnok aotsü," ta Jester-i ashi.

AGWM mobilization & development director, Sarah Jump-i, "Iba sentong nung adenertemi 'iba ya tamakoktsübo masü' ta rajemogo. Iba ya onoki inyaktettsü. Tan putu atema onoki iba ya inyaktettsü, ta onoki bangjemogo," ta metetdaksü.

ANOGO ABEN TSÜNGREM DEN

Tsüngremer uluba jenjang

Aser shiba tulutiba ta parnok rongnung jembitep.  
- Luke. 9:46.

Kar madak temaba asütsü tejangraba meimchir ajak dak keta lir. Asen ajaki asen medemer dang nungi tajungba asütsü bilemer aser tangari asen ajungba indang jembidaktsüner.

Iba tejangraba ya, tesem ka nung junger. Iba yagi asen tajungtiba inyaktsü ajungmesor. Aseni merangba ajak nung tajungba asütsü merangang.

Ajisüaka, aikati pei dak malangba bilemer, tiyazü nung asükümer, pei asoshi tetushi angur. Akhi nisungtem rongnunga tiyazü asüküm agi sünga liasü. Nisungtem rongnung tuluba asoshi o küptepa liasü. Iba mapang nung Tsüngrem tsüngdang koda tuluba akümtsü Yisui sayu.

Tsüngremer ulubaji alima uluba den balala. Alimai tashi, rongsen, temetetba, temaba menden azüaponger. Ajisüaka, shibai Yisu dak amanger Tsüngrem ozüng nung tashi angar, aser shibai ajemalua Kibuba yimli nung tenzöker pajiag chichiba tuler.

Asen tamang, Tsüngremi mulungba nung tashi angaba, aser aseni Kibuba tenzükba ajanga asen uluba agidang Tsüngrembo pelar.

Pastor kati Russia anema sayutsüngiba atema Labor Camp nung puok



**September 10, 2025:** Arrshi aliba Holy Trinity Pentecostal küm 63 pastor, Nikolay Church nung Pastor Nikolay Romanyuk-i Russian Romanyuk-i Russia sepaitem Federation security aija sayutsüngia liasü.

raksatsütsüsa inyaksangshitsü Tenla kidang sabang nungi ayongzükba atema September sayutsüngidang pastor 3 nü pa aija labour camp nung Romanyuk-i, "Tejen Lai nung puoktsü obendang agütsüogo, bushidangang, aser tera danga ta Forum 18-i metetdaksü. shia lira asenoki shilem agitsü akok. Iba ya asen Arogo tangatetba nung shia lir-asenok ya rara anemertem lir, anungji asenoki rara nung shilem magitsüla. Temeshi Lai O nung ajemdaker asenoki asen temeden jembitsüla," ta metetdakja liasü.

Pastor Nikolay ya Russia nunger lir. Pa tambur dang masü saka temang nunga timtem balala lir. Court-i pa aija prison labor camp nung küm pezü puoktsü obendang agütsü, ta International Christian Concern (ICC)-i metetdaksü.

Court nung ken o Pastor Romanyuk aitsüba angadangba mapang nung sülen par jala, Svetlana pastor Nikolay-i, "Au, ni Zhukova-i social media sepaitema tetshia ajanga, "Obalai pa tangatetba jembiba atema pa aitsüogo. Pai ozüng alema meinyak. Pa mapatem ajanga shingiaia timtem majangshi. Linükia timtem majangshi," ta metetdaksü.

Pastor Romanyuk dak temelungjang tashidak lir aser tongtoret majungba den külemi temang nung timtem balala lir, aser pai pa taküm alitsü atema mozü nüngdaker, ta Forum 18-hopta ka shi lir Moscow nung i metetdaksü.



**AO OSHI ANGAZÜKDAK:****TANÜ ANGAZÜKTSÜBA OJANG****Tetsümeli**

(n) tetsüi jembiba oshi (mother tongue)

\* Nisung shiai tetsü oshibo jembitettsüla.

**Tetsüing**

(n) temang nung jaja aoba shilem (leg)

\* Anogo shia tetsüing agi minute 30 bosa jajatsüla.



Tir Yimyim

**OLONG PAITEP # 7267**

|    |  |    |  |   |    |   |    |  |    |
|----|--|----|--|---|----|---|----|--|----|
| 1  |  | 2  |  |   | 3  |   | 4  |  | 5  |
|    |  |    |  |   |    |   |    |  |    |
|    |  |    |  | 6 |    | 7 |    |  |    |
| 8  |  |    |  |   |    |   |    |  |    |
|    |  |    |  |   | 9  |   |    |  |    |
|    |  | 10 |  |   |    |   |    |  |    |
| 11 |  |    |  |   |    |   |    |  | 12 |
|    |  |    |  |   | 13 |   | 14 |  |    |
| 15 |  |    |  |   |    |   |    |  |    |
|    |  |    |  |   |    |   |    |  |    |
| 16 |  |    |  |   |    |   | 17 |  |    |

**TIPIEN**

- Nüji masü - (4)
- Techinütsüka - (6)
- Aketa shirangba - (5)
- Pi - (6)
- Amena - (5)
- Kinü - (5)
- Tanang masü - (5)
- Lenmang - (6)
- Nübo tedi - (5)
- Tuoshi - (6)
- Shiruru apuba temenatsü - (4)

**LANGTSÜNGLEN**

- Jila tulu - (5)
- Sarasademang tembang - (4)
- Tarutsü indang ashirtem - (6)
- Alia - (5)
- Mojing - (5)
- Tai inyakba metet - (5)
- Medemer chijiba - (6)
- Tatokba / Amadok - (5)
- Anügdang masü - (5)
- Jabaso masü - (4)

**OLONG PAITEP # 7266 TELANGZÜBA****TIPIEN :**

- Tesangra, 5. Mungo, 7. Kisen,
- Salem, 12. Semki, 14. Kilem,
- Kensü, 16. Sangpang.

**LANGTSÜNGLEN :**

- Temesen, 2. Raksa, 3. Aon,
- Aso, 6. Nile, 9. Alizüing,
- Omen, 11. Lemta, 13. Ola,
- Kin.

**NAI-A YA METETTER**

US kübok Fort Wayne nung Indiana gardener Alex Babich-i alima otsü tasen ka yangluogo aser ibaji "tallest sunflower" atema lir. Iba sunflower nem 'Clover' ta tenüing jaloktsü aser ali nungi feet 35 feet ser inch 8 talang lir. Guinness World Record-ia iba atema kuli agütsüogo.

2022 nunga Babich-i feet 25 talang tsünütetba atema U.S record for the tallest sunflower nguteta liasü. Iba sülen 2023 nunga pai feet ka talangba tsünütetba kasa otsü yanglu aser 2014 nung Germany nung feet 30 tema talang tsünütetba otsü ajangettsü atema pai kanga meranga liasü.

Tanur asoba anogo nung salem osang den noksa angati adokdaksünöra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tirymyim@gmail.com nung yokang mesüra Tir Yimyim bureau tem nung agüjang.

**Aizawl-Churachandpur tsüngda helicopter service tenzüksü**

Mizoram, Assam aser Manipur nungi Hmar Students Association (HSA) lenirtem den senden ka amendang Chief Minister Lalduhoma-i parnok dang par sorkari Aizawl aser Churachandpur na tsüngda connectivity tajungba kümdaktsü atera helicopter service tenzüksü ta metetdaksü aser iba sentong nung tangokba noksa angur.

**Aizawl, September 10, 2025 (Agencies):**

Mizoram sorkari Aizawl aser Manipur kübok Churachandpur jila sendakteptsü atema helicopter service ka tenzüksü sentong lir.

Mizoram, Assam aser Manipur nungi Hmar Students' Association (HSA) lenirtem den senden ka amendang Chief Minister Lalduhoma-i iba osang metetdaksü.

Manipur nung alirtem den tesentaktep akangshitsü atema sorkari Churachandpur nung Mizoram House ka yanglutsü bilemer ta paisa ashi.

Manipur kübok

Churachandpur aser Pherzawl district tem nung alir asoshi Aizawl ya kanga dang tongtipang tesem ka kümogo. Talisa May 2023 nungi Meitei aser Kuki nung tsüngda rara adokba sülen kanga tongtipang aküm.

Manipur sorkari Aizawl aser Churachandpur tsüngda helicopter service ka tenzüka lir saka iba ya teti mesenzür.

Manipur nung Hmar, Kuki aser Zomi nung ya alemli nungi Mizo nung den azü agi sendaktepa lir.

Mizoram sorkari Tuivai river nung apu yangluba atema HSA lenirtemi pelaba metetdaksü.

Iba apu ajanga Aizawl aser Manipur kübok Pherzawl o Churachandpur district tem sendakteper.

Mizoram CM Lalduhoma-i taküm February ita iba apu lapokja liasü.

Hombarnü Hmar kaketshir lenirtemi Assembly Speaker Lalbiakzama, Sports Minister Lainghinglova Hmar, aser opposition MLA & taoba minister Robert Romawia Royte

Sendentem nung HSA general assembly agitsü aliba aser Mizoram kübok Kolasib district nung taküm December ita Sikpui festival amungtsü aliba onüktem benoka lemsatop.

**Cachar nung police-i taila doctor 2 apu****Silchar, September 10, 2025 (Agencies):**

Assam kübok Cachar district nung police-i taila doctor ana puogo. Assam Council of Medical Registration (ACMR)-i ken o benokba sülen tena apu.

Tena ya Silchar nung alir Pankaj Chaudhary aser Kalain nung Subhir Choudhury na ta jangjaogo.

ACMR anti-quackery vigilance officer Abhijit Neog-i tena anema FIRs benokba sülen tena apu.

Pankaj-i ozüing alema medicine specialist, gastroenterologist, aser diabetologist ka ama inyaka aru. Pai signboards ayu,

prescriptions agütsü aser MBBS, MD, & international fellowships qualifications lir ta tiyazü jembia.

Pankaj-i Registration No. 24147 amshi aser iba ya Uttar Pradesh nung kasa tenüing ka doctor indang lir. Uttar Pradesh nung doctor ya chichiba aser pa ket nung medical degrees lir. Silchar nung mita aodang private clinic ka nung Pankaj apu. Pa ket nung taila PAN aser Aadhaar cards bena aliba sülen apu ta Cachar SSP Numal Mahatta-i ashi.

"Kolkata nung par kinungertemi pa jangjatsü memulungi liasü. Onoki pa indang maitsü chichiba jangjatsü

bushitepar" ta SSP Mahatta-i ashi.

Pankaj ya National Medical Commission Act, 2019, Assam Medical Council Act, 1999, aser Bharatiya Nyay Sanhita (BNS) kübok tai tonglokja puogo.

Ano tanga tatalokba ka nung Subhir Choudhury apu. Kalain nung pharmacy ka nung shiranger ka anepaludang pa apu.

Subhir ket nung recognized qualifications kecha meliaka pai mapang talangka MBBS doctor ka ama inyaka aru.

Subhir-i Basanti Pharmacy nung shirangertem anepalua aru aser police-i pa ket nungi taila kulikaket aika ngutetogo.

**Tripura CM-i Himachal Pradesh nem relief materials yok****Agartala, September 10, 2025 (Agencies):**

Himachal Pradesh nung tzümetsüing agi timtemertem yaritsü atema Tripura Chief Minister Manik Saha-i relief materials abenba truck garitem apusoa yokogo. Iba teyari ya Tripura Pradesh BJP-i anepalua yok.

"Himachal Pradesh nung tzümetsüing ajanga nisung taküm aika samatsüogo. Anentsüh aluba ajanga gari lenmangtem aser aputem raksatsüogo. Tripura nunga asenoki yaküm iba mesükba lendongtem ajurua liasü, anungji asenoki parnok timtemba angateter" ta CM Saha-i ashi.



Tripura nung tzümetsüing 50 lakh jenjang relief lendong ajurudang tanga state temi teyari agütsüba bilemteter aser tang Tripura-i parnok yaritsüla ta Chief Minister-isa ashi.

"Chief Minister's Relief Fund nungi Himachal Pradesh sorkar nem Rs 5 crore yokogo. Ano, party-i Rs

50 lakh jenjang relief materials anepalu aser itemji tanü yoker. Asen State BJP President tang Delhi nung lir aser pai online ajanga sentong nung shilem agiogo. Tensa tamajung ajurudang asenok ajak külemi longjemtsüla aser yaritsüla" ta Saha-isa metetdaksü.



# Nepal nung military-i lenmangtem shibanga toktsü



**Kathmandu, Rongjui/September 10 (Agencies):** Nepal yimtiba nung azütokshi lendong tulu atalokba sülen pranbong injang aser hadir tapet bener sepaitemi Kathmandu nung lenditem meita odar aser nüburtem dang parnok ki toktsür kimai madoktsü atema tetuyuba agüja arudar.

Linük yimtiba nung anogo ana tashi azütokshi lendong tulu atalokba süngjemdaksütsü atema mapang telatetka makai curfew benoker aliba mapang Nepali army-i Bodhbarnü garitem aser nüburtem senzüsenpong kanga junga asadanga liasü.

Anogo ana longkak aitba mapang longkak aitertemi sorkar kitem aika nung mi senoktsü aser Ato Kilonser KP Sharma Oli mapa nungi kangshia anendakja liasü.

Social media sabang balala tenokdangba agütsüba ajanga nüburtemi Hombarnü longkak ait tenzük aser item ya azüoktsü atema security force temi jenjang agiba mapang longkak aiter 19 tepset aser noklang aika yiruja liasü.

Hombar aser Mongolbarnü Kathmandu yimti yimtung nung nüburtem meyirejang aika adenshia longkak ait, koba social media amshitsü atema tenokdangba agütsüba atema dang masü saka linük nung ochi mashi inyakayim aser mapa maka akümba anema dena liasü.

"Onoki tama tensa azüoktsü merangdar," ta army otongdar Raja Ram Basnet-i Reuters news agency dang ashi.

"Nüburtem aser kiojen kümzüka toktsütsü atema onok bendanga agütsür lir," ta otongdarisa shisem.

Oli-i mapa toktsüba sülen barrack tem nungi army tem temai adokba ajanga linük yimtiba nung tensa jungabo maziüokteti liasü.

Mongolbarnü nikongtsütsü longkak aitertemi lenmangtem nokdanga ayu aser parliament, presidential house aser central secretariat maka liasü. Video tem ajanga longkak aitertemi Nepali Congress party lenir Sher Bahadur Deuba aser pa kinungtsü foreign minister, Arzu Rana Deuba na dak azükba nguogo.

Mepetmesü ya mezüngbo sorkari nüngtugu social media sabangtem shibangtsü sentong yangluba ajanga tenzük, ajisüaka Hombarnü longkak aitertem tepsetba ajanga mepetmesü tamajungba aküm aser iba den ochi mashi inyakayim aser mapa makaba tejashitem bendenloker nüburtemi longkak aita liasü.

Longkak aitba mapang ijang agi kashir arishi küm 22 tain Pabit Tandukar-i ashiba agi, "onok yimjung nung longkak aitsü atema ao. Parnoki mezüngbo onok dak tear gas khaloktsü aser onoki parnok nongtemtsü meranga liasü. Ajungbena kü dak injang khaloktsü," ta Tandukar-i Al Jazeera dang ashi.

Yimden yimsüsürtem aser sorkar tenzükер cihirnurtem TikTok aser Instagram amala sabangtem nung parnok takar libaliro sayutepba mapang nüburtem timba kanga

timtemtepdar aser World Bank-i ashiba agi Nepal nung unemployment rate shilem 11 shi lir.

Nepal nungertem million aika mapa bushia Malaysia, Middle East aser South Korea nungeriogo.

Hombarnü Home Minister Ramesh Lekhak-i mezüng mapa toktsü aser iba sülen Agriculture Minister Ramnath Adhikari aser Mongolbarnü Oli-i mapa tokja liasü.

State tekolakba tir Ram Chandra Poudel-i caretaker sorkar ka anitsü atema Oli shimogo, ajisüaka pa kong ali mejangja. Tir-isa longkak aitertem dang azütokshi aser teraksatsüba anena mangatettep ya bentettsü asoshi rangloker inyaksü ayongzükogo.

Maneni army indang helicopter temi minister tem teküzmükba bushia anirogo.

Tawa Bangladesh aser Sri Lanka nung lanurtemi anir sorkar atsüngtokba sülen tang Nepal nung lanurtemi longkak aitba ajanga South Asia tamendakdak anokshiba atema süoki ia bilem tenzükogo.

Kidanger China-ia Bodhbarnü mepetmesü ataloker aliba atema süoki ia bilemba lemsatepogo. Foreign Affairs otongdar kati osangbenertem dang ashiba agi, Nepal nung China nungertem parnok kümzüka alitsü atema jenjang tapet agitsüla aser Kathmandu-i iba tebilemtsü ya benteta takaratiba nung akhi ama inyaksangshi tenzükttettsü Beijing-i imla ataba lemsatepogo.

Küm tem tsüngda China-i Belt and Road Initiative aser tanga inyakymtem ajanga Nepal nung parnok inyakym atsülangshitsü merangdar.

Kasa mapang nung Nepal nung lanurtemi Kathmandu mayor Balendra Shah nem interim sorkar nung parnok tenüng nung nokdakdaksüner.

Arishi küm 35 tain linük yimtiba mayor ya taoba mapang rapper ka liasü aser lanurtem aikati Oli melentsü atema pa Ato Kilonser asoshi toktepdaksüner.

# Poland-i par airspace telungi aitba Russian drones khazüka yok

**Warsaw, Rongjui/Sept. 10 (Agencies):** Ghonda ishika tsüngta Russia indang drones kar ozü litsü alema ait aser NATO allies teyari nung khazüka yok aser ibai Russia-i Ukraine amakba mapang "act of aggression" inyakba lir, ta Poland-i Bodhbarnü ashi.

Kremlin-i sangdong agütsütsü memulung, saka par tembar linük, Belarus-i drones kar mapa shidak meinyaki lenmang tezüleni ao ta ashi. Ajisüaka European lenir aikati ibai Russia-i Ukraine den raraba nung asaa tensa tamajungba kumdaksütsü inyakba lir ta amanger, ta ashir.

Drones kar Belarus nungi aru ta Poland-i ashir, kong Russia aser Belarus sepaitem Hokulbarnü nungi war games tenzüktsü asoshi adenshia lir.

Russia-i 2022 küm nungi tashi ajak amshia Ukraine amakdang temelaba makai Polish airspace alema aiben ait, ajisüaka Poland nung süshia mesüra NATO aser European Union indang odongtar kati alliance-i tang mezüngbuba airspace nung timtem agütsütsüsa tensa ajurua liasü ta ashi.

Iba tatalokba indang jembitsü asoshi NATO senden amen, koba rara tenzükер Russia-i Ukraine dak anünglen nungi tesashitiba maper anogo asem lir atalok.

"Russia indang rara tesashiba akumer, tembanger masü. Yasüng Poland nung rara tenzükер Russia-i European airspace nung aibelen tulutiba asenoki nguogo, aser ibai asaa inyak ama ajiteter," ta European Union foreign policy chief Kaja Kallas-i ashi.

Arütsü alema aitba ya koba tashiar ano mejangjateter, saka Poland Ato Kilonser Donald Tusk-i

parliament nung ashiba agi, ghonda tenet tsüngta aibelen 19 ben liasü aser osang tang bendenba mapang lir. Drones tsükba tesem ti ngutetogo, ta sorkar indang odongtar kati ashi. Poland yaritsü atema Dutch fighter jets tem aru aser drones kar nokdang, ta Netherland indang defense minister-i ashi.

"Ibai tashiyim mapa inyakba lir, kong asen nüburtem asoshi lendong lir," ta Polish military indang operational command ajanga social media nung ashi.

France Tir Emmanuel Macron-i Russia dang tapi agi tensa tamajungba akumba tatem kati arutsü ashi aser Czech Ato Kilonser Petr Fiala-ia iba aibelen ya NATO linüktem indang defense tashi tendangba lir ta ashi.

Mezüng Mongulbar aonung 11:30 ako mena arütsü alema ait aser tatembangba ya Bodhbarnep 6:30 ako meta liasü, ta Tusk-i parliament dang ashi.

Defense Minister Wladyslaw Kosiniak-Kamysz-ia social media X nung Polish airspace alema oset 10 dak tema ait ta ashi.

Poland-i ghonda ishika par airspace shibang aser Warsaw indang Chopin Airport nunga tayimtsütem athi.

Ukraine Tir Volodymyr Zelenskyy-i iba ya Europe asoshi lendong tamajung lir ta ashi aser Russia dang timtem ajurutsü bilemtsü ashi.

Taoba mapanga Ukraine amakdang Russian 'objects' tem par airspace telungi aitba indang Poland-i ashishia liasü.

August ita nunga 'flying object' ka Poland anüdoklen menti lu nung tsüka apok aser ibai Russia indang drone ta jangjateta liasü.

March ita Russian missile ka Ukraine anüolen tsütsü khaloktsüba Polish airspace ajanga aoba mech Poland-i jets tem yoka liasü.



GOVERNMENT OF NAGALAND

**DIRECTORATE OF HIGHER EDUCATION**

NAGALAND, KOHIMA

www.highereducation.nagaland.gov.in      dir.highedu@gmail.com

NO.HED/SCHO/MISC/36/2025/131      Kohima, dated the 9th September, 2025.

**EXTENSION OF ONLINE SCHOLARSHIP APPLICATIONS IMPLEMENTED BY HIGHER EDUCATION**

This is to inform all Educational Institutions and Students that the online applications for **Post Matric Scholarship (PMS ST) and the State Merit & Research Scholarship** for the Academic year 2025-26

| PROCESS                                                                                                             | FRESH/ RENEWAL                                                 |
|---------------------------------------------------------------------------------------------------------------------|----------------------------------------------------------------|
| Registration for the Students                                                                                       | 7 <sup>th</sup> July, 2025 till 31 <sup>st</sup> October, 2025 |
| Completion of Verification by the Institutes (for State Merit & Research Scholarship)                               | 31 <sup>st</sup> October, 2025                                 |
| Correction of Defective Applications by the Students & the Institutes (Applicable for Post Matric Scholarship only) | 15 <sup>th</sup> November, 2025                                |
| Completion of Verification by the State                                                                             | 30 <sup>th</sup> November, 2025                                |

Sd/-  
(V. LOVITOLY SEMA), NCS  
Ex-Officio Director  
Higher Education  
Nagaland : Kohima



OFFICE OF THE

**LONGPANGTSÜNG WARD YIMDEN**

CHANGTONGYA TOWN

P.O. Changtongya – 798613, Dist – Mokochung: Nagaland.

**TUSHIR**

Langpangtsüng Ward Yimden-i Wb. Imlilepzüp Jamir aser Wt. Tintula na jabaso **Sb. Temjentoshi Jamir** ajanga Naga Students' Federation nung Secretary, Publicity & Information (2025 - 2027) mapa ajangzükttetba asoshi kangasa pela-a tushiba lemsateper.

Tsüngrem nungi anguba shisatsü tajungtiba agi bendanga agüja ochi nung lokti asoshi tenzüktsü Pai len aniangma.

Sd/-  
**Purtoshi Jamir**  
Chairman, LWY



Sd/-  
**Lanuküzmük Jamir**  
Secretary, LWY



## Inter KIC U-16 Badminton asayamung tembangogo



**Dimapur, Rongjui/September 10 (TYO):** 2buba Inter Khelo India Centre (KIC) Under-16 Badminton asayamung Bodhbarnü Multi purpose Indoor Stadium Pfutsero nung tembangogo. Asayamung ya Department of Youth Resources & Sports Nagaland tawabangba kübok asaya liasü.

Asayamung shibangba sentong nung alaktera jaoker DC Phek Rhosirho Nguori-i asayartemi kanga meranga asayaba atema parnok nem tenüngsang agütsü, aser parnok sempet maneni arantetshia asayatsü aser temaba jenjang tongtettsü atema meranga

asaya-a konang tetushi bener agütsütsü ajungshia liasü.

Paisa asayartem dang lokti nung tongtibang shilem agitsü aser tangar ajungmesotsü ajungshia liasü.

Nguori-isa, asayartem dang social media ya tamshi shia amshitsü ajungshi.

Asayamung shibangba sentong ya Director, Youth Resources & Sports, Nagaland lenisüba nung agi aser Deputy Director, Youth Resources & Sports Nyuvitho Nyuthe-i tepela o jembia liasü.

**Asayamung nung takok angurtem:**

**Tebur kija asaya:**

1st- Heloka Swu (Niuland)

2nd- Rhoyi Hoshi (Phek)

3rd- Aowalu (Mokokchung)

**Tetsür kija asaya:**

1st- Yalemjungla (Mokokchung)

2nd- Moimei C Phom (Longleng)

3rd- Phalnelhei (Peren)

**Tebur tarep asaya:**

1st- Arkotong aser Mesensen (Mokokchung)

2nd- Tursa aser Tinato (Niuland)

3rd- Thengoi aser Yongdok Mukho (Longleng)

**Tetsür tarep asaya:**

1st- Nengtinkim Haokip aser Themnunmoi (Peren)

2nd- Liviya aser Linokivi (Zunheboto)

3rd- Purnima aser Weangya (Mon).

## NTA-i takok angur nem tetushi agütsü



**Kohima, Rongjui/September 10 (TYO):** Nagaland Taekwondo Association (NTA)-i, state nungi national aser international jenjang nung takok tajung anguba taekwondo asayar aser referee tem nem tetushi agütsüba sentong ka ayongzüka agi.

Bodhbarnü Hotel Japfu Kohima nung tetushi agütsüba sentong ka ayongzüka agiba mapang NTA tir Pele Khezhi-i Nagaland nung taekwondo asaya kanga renloka aoba ngua kanga nema adangba aser iba asaya tarutsü tajung aliba indang lemsatepa liasü.

Khezhi-i ashiba agi, South Korea nung July 20 aser 21 nü Seongnam Open International Taekwondo Championships nung shilem agitsü atema pa den Director of Youth and Sports Resources Kethosituo Sekhose nati India tenüng nung Nagaland Taekwondo team meiner aotsü maongka ngua liasü.

State nungi asayartemi kanga junga asayaba indang lemsatepba mapang paisa, national aser international

jenjang nung tongtibang shilem agia Nagaland nem konang tetushi bener arutsüba atema referee Theja Keretsü aser Moon Thapa na nema tenüngsang agüja liasü.

South Korea nung asayaba asayar trok rongnung asayar aseme gold medal ngua liasü. Vilab?zo Nagi-i under 68 kg category, Sentimoa Ozukum-i under 56 kg category aser Athongti-i under 49 kg category nung gold medal ngua liasü.

"Item takoktem ya Nagaland atema dang masü saka India asoshi nemadangtsü mapang lir," ta Khezhi-i ashi.

Maneni state nungi delegate temi Seongnam Sports University den Memorandum of Understanding (MoU) ka nung sign süogo, aser iba ajanga international jenjang nung training agitsü atema maongka angutsü aser Nagaland nungi tarutsü nung taekwondo asayartem ajangzüksü, ta pai ashi.

Korea semdangba mapang Kukkiwon tir Dr. Dongsup Lee den ajurutep, shibai Nagaland team dak takok nguyonga aotsü sempet aliba aser parnok asaya

tanüla tajung aliba atema tenüngsang agütsüba den takok tashi teyari agütsütsü nangzüka liasü.

Maneni Khezhi-isa, state nung lanurtem aser saisabong ajungkettsü atema bendanga agüja inyakba atema Nagaland Olympic Association tir aser Chief Minister Neiphiu Rio aser Director YRS Sekhose na dang kanga pelaba lemsatep.

Kasa anogo NTA-isa, Cuttack, Odisha nung August 28 nungi 30 tashi asayaba 4th Sub-Junior National Taekwondo Championship nung takok angurtem tushia liasü. Nagaland nungi Sudeh Laml?u-i Under 29 kg nung gold medal, 35 kg nung Shiusuthong-i gold medal aser Under 50 kg nung Iciheing Ntang-i silver medal angü.

Taekwondo coach Visabiu Peseyie aser Tiamera Aier, NIS na nema Latest Taekwondo rules & regulations, Coach License takok ngua tembangtetba atema tenüngsang agütsü, koba August 23 aser 24 nü INDIA Taekwondo-i ayongzüka agia liasü.

## 25th NSF Martyrs' Memorial Trophy nung team 45 asayatsü

**Kohima, Rongjui/September 10 (TYO):** 25buba NSF Martyrs' Memorial Trophy Indira Gandhi Stadium, Kohima nung September 13 nü tenzüksü. Iba asayamung ya October 18 tashi asayatsü aser asayatem Chümoukedima Football Stadium nunga asayatsü.

Iba asayamung ya Lt. Kekoujalie Sachü aser Lt. Vikhozo Yhoshü na nüngdem nung Angami Students' Union (ASU), den longjemer Naga Students' Federation (NSF)-i ayongzüka asayar.

Mongolbarnü ASU office nung osangbenertem den sensaksemba mapang asayamung ayongertemi, taküm iba asayamung nung Nagaland nungi team 36, Manipur nungi team 7 aser Sikkim o Delhi na nungi team kaka densema team 45-i shilem agitsü ta metetdaksü.

Asaya 44 nungi 36 IG Stadium, Kohima nung asayatsü aser asaya 8 Chümoukedima Football Stadium nung asayatsü.

Team ti indang indanga pre-quarterfinals-i aiba dak sendakba nung asayamung ayongertemi ashiba agi, team pongu taoba mapang NSF asayamung koker alirtem aser team asem tejaokertem lir ta ashi.

IG Stadium nung

mezüngbuba asaya angati agi repringtsü aser tanungba asayatem atema ticket sen 50 asütsü. Quarterfinal nungi ticket sen 100 asütsü.

September 13 nü asayamung lapokba sentong nung Minister for Rural Development and SIRD, Government of Nagaland Metsubo Jamir tongti tejaoker asütsü. Iba sentong ya 4:30 nung tenzüksü.

Taküm iba asayamung nung mezüngbubaba asaya Chedema Village Youth Organization aser Amigos FC Tesophenyu, Tseminyu na asayatsü.

Asayamung akoker nem sen lakh 5 aser runners-up nem sen lakh 3 agütsütsü. Semifinal nung tamakok anguba team ana nem sen lakh kaka aser quarter-final nung tamakok angurtem nem sen 80,000 agütsütsü.

Maneni Player of the Tournament nem two-wheeler ka agütsütsü aser Best goalkeeper, Best Defender, Best Midfielder, Top Scorer, Fair Play Team aser Most Promising Player (Under 20) nem senpet sen 25,000 agütsütsü. Best Coach aser Best Referee na nema senpet sen 10,000 agütsütsü aser asaya shia Player of the Match nem kuli kakat aser memento agütsütsü.

## Hong Kong Open: Prannoy, Sen, Kiran nungeri asaya kokogo

**Rongjui/September 10, 2025 (Agencies):** Hong Kong Open 2025 nung Bodhbarnü India nunger tebur asayartem rongnungi HS Prannoy, Lakshya Sen aser Kiran George nunger ajaki pei tata asaya kokogo

Mezüngbuba asaya nung Prannoy-i 21-17, 21-14 agi China nunger asayar Lu Guangzu akok aser George-i Singapore nunger asayar Jason Teh 21-16, 21-11 agi koka liasü. Tasembuba asaya nung Lakshya-i set asem asayaba sülen 22-20, 16-21, 21-15 agi Wang Tzu-wei koka liasü.

Bodhbarnüsa tetsür kija asaya nung PV Sindhu bo Round of 32 nung Denmark tsür Line Christophersen-i 15-21, 21-16, 21-19 agi tsükdaksüogo.

World number 34 Prannoy-i jenjang 14buba nung alisang Lu Guang Zu ya minute 44 nung akok aser Sen-a set asem tashi kanga meranga asayarang tebur kija asaya pre-quarterfinals tongtetogo.

Kiran George-ia pa dang jenjang temaba nung aliba Singapore nunger asayar Jia Heng Jason Teh 21-16, 21-11 agi minute 34 nung koka round of 16 tongtetogo.

Sindhu trokbenbuba nung tang mezüngbuba arishi küm 25

tain Christophersen-i kokogo. Taküm küm tetenzüklen Swiss Open aser Japan Open nung kanga kara tsükatokba sülen la tang form dangi tera arua asayaba mapang iba asayamung nunga tamakok nguogo.

Mezüngbuba game nung Sindhu 3-1 agi tejakdang sür tenzü k ajisüaka Christophersen-i la menepa point 5-5 aküm. 14-13 ta Sindhu tejakdang akümba sülen lai Christophersen-i point ka dang ngudaktsür asaya koka liasü.

Tanabuba game nung Sindhu 13-12 agi tejakdang liasü saka lai aibelen aika menaba ajanga Christophersen nem takok agüja liasü.

Tasembuba game ya asayar ana tsüingda kanga toktepa asaya aser 19-19 ta kasasa aliba mapang Christophersen-i point ana atonga ngua asaya akok.

Tetsür tarep asaya nung Rutaparna Panda aser Swetaparna Panda nati round-of-32 nung Hong Kong tsür Oi Ki Vanessa Pang aser Sum Yau Wong na 17-21, 9-21 agi kokogo.

Kasa mapang nung Chinese Taipei tsür Chen Cheng Kuan aser Hsu Yin-Hui nati Dhruv Kapil aser Tanisha Crasto na 16-21, 11-21 agi koka liasü.

## BILEMDANGANG

**"Tembar tajung kati na indang indanga metongshitsütsü."**